



THE WHOLE STORY



IBHUKU LOMTHANDAZO WENSUKU ZONKE



ITAFULA YEMIBHALO

03 **UKUQAKATHEKA KOMTHANDAZO
WENSUKU ZONKE**

04 **IMITHANDAZO
YEKUSENI**

08 **IMITHANDAZO
YEMINI**

11 **UMKHULEKO
WANTAMBAMA**

14 **IMITHANDAZO
YANTAMBAMA**

16 **IMITHANDAZO LOKUBUSISA
NGEZIKHATHI OZIKHETHILEYO**

Ukuqakatheka komthandazo wensuku zonke

Injayelo zensuku zonke ziqakathekile empilweni zethu. Ziletha inqhubeko, lokukhokhelwa, njalo lokwethembeka empilweni zethu nsuku zonke. Lokhu kuyasinceda ukuthi siphile ngokuqonda njalo ngokuzimisela. Mhlawumbe ungabe ulenjayelo ozenzayo nxa uvuka ekuseni nsukuzonke. Kodwa nxa kungasenzakalanga kwenza ulahleke njalo ungaboni kuhle. Kwabanye kulula njalo kuyinjayelo ukuthi nxa sivuka ekuseni siqale ilanga ngokwelula imizimba yethu kumbe ngokugijima. Manje injayelo zokuthandaza kumbe ukubala ibhayibhili sikwenza nini? Singazijayeza njani ukwenza lezi injayelo empilweni zethu ukuze siphumelele ekuphileni kwethu?

Ngezikhathi zempilo yama Heberu sifunda imikhuba yabo yokukhonza uNkulunkulu. Imikhuba yokukhonza uNkulunkulu kwakuyinjayelo egoqela impilo zabo. Ngelanga ngelanga babelezikhathi zokuthandaza. Ngeviki babesiba lelanga lesabatha lokuphumula. Ngeminyaka yonke babesiba lemihlango ekaqathekileyo yezikhumbuzo zobuhle lokuthembeka kuka Nkulunkulu njalo lembale yokholo lwabo. Ku Misebenzi yabaphostoli 3:1 sifunda ngo Petro lo Johane bekhuphukela ethempelini emini yantambama ngesikhathi sokukhuleka. Ku Daniyeli 6: 10 sifunda ngo Daniyeli owayethandaza kathathu ngosuku. Lokhu wayekwenza nsukuzonke. Impilo zabo zazibunjwe kulezi injayelo zempilo yomthandazo lokubala ibhayibhili nsukuzonke.

Imizimba yethu ijayele ukugcwaliswa ngokudla, kunjalo ke futhi emoyeni wethu kufanele sigcwaliswe ngokudla komoya okwakha impilo yokholo lwethu. Abanengi bethu bathanda ukudla kathathu ngelanga. Kungaba kuhle njani nxa singazipha izikhathi ezimfithshane ukwakha umoya wethu ngokuthandaza lango kubala izifundo zebhayibhili. Lokhu kungasenza siqine emoyeni njalo lokholweni lwethu!

Ungazinika ilanga ngelanga isikhathi sokubala umlayo welizwi leNkosi, unjengo muntu ohamba ngemfundiso kwabaseRoma 12: 2 “Lingalingisi lumhlaba, kodwa liphendulwe ngokwenziwa zibentsha ingqondo zenu, ukuze libonisise okuyintando kaNkulunkulu, lokulungileyo, lokwamukelekayo, lokupheleleyo.” Nxa unakana ngokubala ilizwi leNkosi njalo uthandaza, uyabe uphendula ingqondo yakho. Nxa ungenza lokhu, uMoya oNgcwele uzakukhokhela ngezikhathi zonke njalo akuncedise ukuze uboniswe okuyintando kaNkulunkulu ngelanga ngelanga.

Siyalikhuthaza ukuthi lisebenzise ibhuku leli lemithandazo ngendlela ezakwenza lincadakale izikhathi zonke njalo kumacebo wenu ngelanga ngelanga. Izigaba zekuseni, emini, njalo ntambama zigoqela imibhalo okumelele liyibale njalo lemithandazo yokuthandaza. Silifakele izigaba zemithandazo lezibusiso ezigoqela indlela zokuthandaza ngezikhathi zonke. Ibhayibhili lisifundisa ukuthi amazwi ethu alamadla okukhuluma lokukholwa izithembiso zebhayibhili. Thandazani imibhalo yeLizwi leNkosi njalo lithandaze ngamandla empilweni zenu, lihlangele lemuli kumbe lilabangane benu. Lithandaze amazwi elizwi leNkosi ngamandla komunye lomunye.

IMITHANDAZO YEKUSENI

Thandaza zonke lezi ingwalo ze Lizwi LeNkosi nsukuzonke ekuseni labazalwane bemuli ka Nkulunkulu emagumbini omhlaba.

UShema (Duteronomi 6:4-5)

Zwana, Israyeli, ukuthi; Inkosi ingu Nkulunkulu wethu, yiNkosi yinye. Wothanda iNkosi uNkulunkulu wakho ngenhliziyo yakho yonke langomoya wakho wonke langamandla akho wonke.

Umthandazo weNkosi uJesu (Umathewu 6:9-13)

Baba wethu wasezulwini, kalidunyiswe ibizo lakho, umbuso wakho kawuze, intando yakho kayenziwe, emhlabeni njengasezulwini. Siphe lamuhla ukudla kwethu kwensuku ngensuku. Usithethelele izono zethu, njengalokhu lathi sibathethelela abasonayo. Ungasingenisi ekulingweni, kodwa usikhulule ebubini. Ngoba umbuso ungowakho, lamandla, lobukhosi, kuze kube nini lanini, Amen.

Ukubusiswa kwabantu ngabapristi (Amanani 6:24-26)

Inkosi ilibusise, ililondoloze. Inkosi ikhanyisele ubuso bayo phezu kwenu, ibe lomusa kini. Inkosi iphakamise amehlo ayo ilikhangele, ilehlisele ukuthula. Nge Gama lika Jesu Umsindisi, Amen.

Khetha okunye kumbe okutshiyeneyo ongakuthandazela kuzinto lezi, uhlanganise lemithandazo ephezulu. Ungakwenza ukuthi ukuhlanganise lezifundo zebhayibhili ngokulandela indlela yokubala njengoba kutshengisa ku (YouVersion Bible app).

Izililo 3:22-24

Uthando olungapheliyo lweNkosi luhlala njalo, lesihawu sayo kasilakucina. Kutsha insuku zonke ekuseni, lokuthembeka kwayo kukhulu. Umoya wami uthi: INkosi iyisabelo sami, ngakho ngizathemba kiyo.

UJoshuwa 24:15

Uba lingafuni ukuyikhonza iNkosi, khethani lamuhla lowo elizamkhonza, onkulunkulu abakhonzwa ngokhokho benu elizweni elingaphetsheya komfula iYufurathi, loba onkulunkulu bama Amori elihlala elizweni lawo. Mina lendlu yami sizayikhonza INkosi.

Amahubo 119:105-106, 112

Ilizwi lakho liyisibane enyaweni zami, lokukhanya endleni yami. Ngifungile, ngaqinisa, ukugcina izimiso zakho ezilungileyo. Ngizimisele ukugcina izimiso zakho kuze kube sekupheleni.

Amahubo 145:1-9

Ngizakudumisa wena, Nkulunkulu wami le Nkosi yami, ngibonge ibizo lakho kuze kube nini nini . Insuku zonke ngizakubonga, ngidumise ibizo lakho kuze kube nini lanini. Inkosi inkulu, ifanele ukudunyiswa kakhulu, lobukhulu bayo bungehlolisisiwe. Esinye isizukulwane sizakubabaza imisebenzi yakho kwesinye, sitshumayele imisebenzi yakho elamandla. Ngizakunakana ngodumo lwakho lobukhosi bakho, langemisebenzi yakho emangalisayo. Abantu bazakutshumayela amandla ezenzo zakho ezesabekayo, mina ngibabaze ubukhulu bakho. Bazakwandisa udumo lokulunga kwakho okukhulu, bahlabele kakhulu ngokulunga kwakho. Inkosi ilomusa lesihawu, iyaphuza ukuthukuthela, igcwele uthando olungapheliyo. INkosi ilungile kubo bonke, lesihawu sayo siphezu kwakho konke ekwenzayo.

Intshumayelo ka Jesu esentabeni (UMathewu 5:2-11)

Wase vula umlomo wakhe, wabafundisa wathi: Babusisiwe abangabayanga emoyeni, ngoba umbuso wezulu ungowabo. Babusisiwe abakhalayo, ngoba bazakududuzwa. Babusisiwe abamnene, ngoba bazakudla ilifa lomhlaba. Babusisiwe abalambele bomele ukulunga, ngoba bazakusuthiswa. Babusisiwe abalesihawu, ngoba bazakuhawukelwa. Babusisiwe abalenhliziyo ezihlambukileyo, ngoba bazakubona uNkulunkulu. Babusisiwe abalamulayo, ngoba bazakuthiwa ngabantwana bakaNkulunkulu. Babusisiwe abazingelwa ngenxa yokulunga, ngoba umbuso wezulu ungowabo. Lina libusisiwe, nxa abantu belithuka ngenxa yami, belizingela bekhuluma okubi ngani, beqamba amanga.

Amahubo 111

Dumisani iNkosi! Ngiyayibonga INkosi ngenhliziyo yami yonke, emhlanganweni lasebandleni labaqotho. Mikhulu imisebenzi yeNkosi, labo abayithandayo bayayifunda. Umsebenzi wayo ulodumo lobukhosi, lokulunga kwayo kuhlala kuze kube nini nini. Yenzile ukuba imisebenzi yayo emangalisayo ikhunjulwe; iNkosi ilomusa lesihawu. Iyabapha ukudla labo abayesabayo, iyakhumbula njalo isivumelwano sayo. Ibatshengisile abantu bayo amandla emisebenzini yayo, ngokubanika ilizwe lezizwe. Imisebenzi yezandla zayo iqotho ilungile, lemithetho yayo yonke ithembekile, imisiwe kuze kube nini nini, yenziwa ngeqiniso langobuqotho. Yabakhulula abantu bayo, yamisa isivumelwano sayo kuze kube nini nini, lingcwele liyesabeka ibizo layo. Ukuyesaba iNkosi kuyikuqala kokuhlakanipha, balengqondo enhle bonke abalaxho. Ukudunyiswa kwayo kumi kuze kube nini lanini.

Amahubo 91

Yena owakhileyo ekusithekeni koPhezukonke, ohlala emthunzini kaSomandla, uzakuthi eNkosini: Uyisiphephelo sami lenqaba yami, Unkulunkulu wami engithemba kuye. Ngoba yena uzakukukhulula emjibileni womthiyi, lakuwo umkhuhlane obhubhisayo. Uzakukusibekela ngensiba zakhe, uphephele ngaphansi kwamaphiko akhe, ubuqotho bakhe buyisihlangu lehawu. Kawuyikwesaba ukwesaba kwebusuku, lomtshoko ophaphayo emini, lomkhuhlane ohambayo emnyameni, lokufa okubhubhisayo emini enkulu. Bazakuwa abayinkulungwane ngaseceleni kwakho, labayizizukulwane ezilitshumi ngakwesokunene sakho, kodwa wena kawuyikulimala. Uzakukhangela nje ngamehlo ubone ukuphindiselwa kawababi. Ngoba uyenzile INkosi yaba yisiphephelo sakho, oPhezukonke waba yinqaba yakho, kawuyikwehlelwa ngokubi, lesifo kasiyikusondela emzini wakho. Ngoba uzakulaya izithunywa zakhe ngawe, ukuba zikulondoloze endleleni zakho zonke. Zizakuthwala ngezandla zazo, ukuze ungakhubeki elitsheni ngonyawo lwakho. Uzakunyathela isilwane lebululu, izilwane lenyoka uzakuzinyathela phansi. Ngenxa yokuba ungithanda, ngizakumkhulula, ngizakumvikela, ngoba uyalazi ibizo lami. Lapho ekhuleka kimi, ngizakumphendula, ngizakuba laye ekuhluphekeni, ngimkhulule, ngimnike udumo. Ngizakumnika insuku ezinengi ngimtshengise ukukhulula kwami.

IMITHANDAZO YEMINI

Ketha okunye kumbe eminye imithandazo njalo unakane ngayo ngezikhathi zemini.

Amahubo 114:15

Babusisiwe abantu abehlelwa yizibusiso. Babusisiwe abantu abakonza uNkulunkulu eyiNkosi yabo.

Amahubo 84:5

Babusisiwe abantu amandla abo akuwe, okukhona enhliziyweni zabo yisifiso sokuya eZiyoni.

Ubusisiwe umuntu ophila ngokubala ilizwi leNkosi lokuthandaza. Uzakudumisa ngezikhathi zonke. Babusisiwe abantu bonke abaphila ngokubala iLizwi lakho lokuthandaza. Babusisiwe abantu abaphila kuNkulunkulu. Nge bizo lika Jesus, Amen.

UDuteronomi 4:39

Ngakhoke yazini lamuhla, likugcine enhliziyweni zenu ukuthi iNkosi inguNkulunkulu phezulu ezulwini laphansi emhlabeni, kakho omunye.

Izambulelo 1:8

“Mina nginguAlfa lo Omega, kutsho iNkosi uNkulunkulu okhona lowayekhona lozakuba khona, uSomandla.

Amahubo 145:10-21

Imisebenzi yakho yonke izakukudumisa, Nkosi, labangcwele bakho bazakukubonga. Bazakukhuluma ngobukhosi bombuso wakho, balandise ngamandla akho, ukuba bazise abantu izenzo zakho zamandla, lobukhulu bobukhosi bombuso wakho. Umbuso wakho ungumbuso ongapheliyo, lobukhosi bakho bumi zonke izizukulwana. iNkosi ithembekile emazweni ayo wonke, ingcwele umusa ezenzweni zayo zonke. INkosi iyabasekela bonke abawayo, ibavuse bonke asebewile. Amehlo abo bonke akhangele kuwe, uyabanika ukudla kwabo ngesikhathi esifaneleyo. Wena uvula isandla sakho, ukholise ukufisa kwezinto zonke eziphilayo. iNkosi ilungile endleleni zayo zonke, ilomusa ekwenzeni kwayo konke. Inkosi iseduze labo bonke abakhuleka kuyo, bonke abakhuleka kuyo ngeqiniso. Iyakholisa isifiso sabo bonke abayesabayo. Iyezwa lokukhuleka kwabo, ibakhulule. iNkosi iyabalondoloza bonke abayithandayo, kodwa ababi izakubabhubhisa. Umlomo wami uzayidumisa iNkosi, labantu bonke kababonge ibizo layo eligcwele kuze kube nininini.

Amahubo 19:14

Amazwi omlomo wami lemicabango yenhliziyi yami kakwamukeleke kuwe, Nkosi, dwala lami lomhlengi wami.

Amahubo 51:15

Nkulunkulu, vula indebe zami ukuze umlomo wami ukudumise.

UJoshuwa 1:9

Qina ume isibindi, ungesabi, utshaywe luvalo, ngoba iNkosi uNkulunkulu wakho ilawe kuyo yonke indawo lapha uya khona.

Kwabasefiliphi 4:4-9

Thokozani eNkosini njalonjalo, ngiyaphinda ngithi: Thokozani. Ukubekezela kwenu kakwaziwe yibo bonke abantu, iNkosi iseduze. Lingakhathazeki ngalutho, kodwa kukho konke izicelo zenu kazaziwe ngu Nkulunkulu ngokukhuleka langokunxusa kanye langokubonga. Ukuthula kuka Nkulunkulu okudlula ukuqedisisa konke kuzakulondoloza inhliziyi zenu lemicabango yenu kuKristu Jesu. Elokucinake, bazalwane, konke okuliqiniso, konke okuhloniphekayo, konke okulungileyo, konke okuhlambululekileyo, konke okuhle, konke okulodumo oluhle, uba kukhona okudumisekayo, nakanani ngakho lokhu. Elakufundayo, lakwamukela, lakuzwa, lakubona kimi, kwenzeni lokho, ngakhona uNkulunkulu wokuthula ezakuba lani.

UMKHULEKO WANTAMBAMA

Ketha okunye kumbe iminye yalezi, uthandaze lo kunakana ngakho ntambama ngentambama.

Amahubo 79:13

Ngakhoke singabantu bakho, umhlambi wedlelo lakho, sizakukubonga kuze kube nini nini, sitshumayele udumo lwakho ezizukulwane ngezizukulwana.

Siyakubonga Nkulunkulu wethu - impilo zethu zisezandleni zakho. Ukuphila kwethu kuvela kuwe. Izimangaliso zakho ngelanga ngelanga. Izimangaliso zakho ngezikhathi zonke, ebusuku, ekuseni, lase mini. Umusa wakho awupheli. Ngaso sonke isikhathi sithembela kuwe. Nge Bizo lika Jesu, Ameni.

Amahubo 121

Ngizakuphakamisela amehlo ami ezintabeni. Usizo lwami luzakuvela ngaphi na? Usizo lwami luzakuvela eNkosini eyenza izulu lomhlaba. Yona kayiyikuvuma ukuba unyawo lwakho lutshelele, yena okulondolozayo kayikuwozela. Khangela, yena olondoloza ulsrayeli kayikuwozela alale. INkosi ingu mlondolozisi wakho, iNkosi ingumvikeli wakho ngakwesonene sakho. Ilanga kalikuyikukulimaza emini, lenyanga ebusuku. INkosi izakukulondoloza kukho konke okubi, izakulondoloza ukuphila kwakho. INkosi izakulondoloza konke ukuhamba kwakho, kusukela kulesisikhathi kuze kube nini nini.

Kwabasefiliphi 1:6

Ngilethemba lokuthi yena lowo owaqalisa umsebenzi omuhle kuni uzakuwuphelelisa kuze kube sosukwini lukaJesu Kristu.

Amaheberu 4:14,16

Ngakhoke lokhu silompristi omkhulu kakhulu odlule emazulwini, uJesu iNdodana kaNkulunkulu, asibambebele kuso isivumo sethu. Ngakhoke asisondele ngesibindi esihlalweni somusa ukuba samukeliswe isihawu, sizuze umusa wokusisiza ngesikhathi esifaneleyo.

Kwabase -Efesu 3:14-21

Ngenxa yalokhu ngiguqa ngamadolo kuYise, okubizwa ngebizo lakhe lonke usendo olusezulwini lolusemhlabeni, ukuba ngokwenotho yobukhosi bakhe liqiniswe ngamandla ngoMoya wakhe enhliziyweni uKristu ahlale enhliziyweni zenu ngokukholwa.

Lokhu selilemphande, lesisekelo othandweni, kalibe lamandla okuqedisisa kanye labo abangcwele ububanzi, lobude, lokudepha, lokutshona kothando lukaKristu, lokulwazi lanxa lusedlula ukwazi konke, ukuze ligcwaliswe ngakho konke ukugcwala kukaNkulunkulu. Ngakhoke yena olamandla okwenza okukhulu ukwedlula konke esikucelayo lesikunakanayo ngamandla akhe asebenza kithi, kakube kuye udumo ebandleni laku-Kristu Jesu ezizukulwaneni zonke kuze kube lanini. Ameni.

IMITHANDAZO YANTAMBAMA

Ketha okunye kumbe okunengi ngokuthandaza langoku zidla ngakho ungakalali

Amahubo 3:5

Ngilele phansi, ngijunywa yibuthongo, ngivuka futhi, ngoba iNkosi ingilondolozile.

Amahubo 4:8

Ngizakucambalala ngokuthula, ngilale ubuthongo, ngoba wena Nkosi wedwa uyangilondoloza.

UJohane 8:12

UJesu wakhuluma labo futhi wathi: “Mina ngiyikukhanya komhlaba, ongilandelayo kasoze ahamba emnyameni, kodwa uzakuba lokukhanya kokuphila”.

Uphakeme, Nkosi Nkulunkulu wethu, Nkosi yomhlaba ongenza ngiwozele njalo ngilale. Ngicela ungilalise ngokuthula njalo ungivuse ngokuthula. Ungivikele kukho konke okubi, amaphupho kumbe imicabango emibi engqondweni yami. Kangivuke ngokukhanya njalo ngokukhanyiselwa emehlweni ami, ngoba uyisibane somhlaba wonke ngenkazimulo yakho. Nge Bizo lika Jesu, Ameni.

**IMITHANDAZO
LOKUBUSISA
NGEZIKHATHI
OZIKHETHILEYO**

Thandaza imithandazo leyi lezibusiso ngezikhathi ozikhethileyo

AMANDLA OKUVUSWA KUKA JESU

Ulsaya 25:8

Izakuqeda ukufa kokuphela. INkosi uNkulunkulu izakwesula inyembezi emehlweni wonke, isuse lehlazo labantu bayo emhlabeni wonke, ngoba iNkosi ikhulumile.

Johani 11:25-26

Mina ngiyikuvuka lokuphila, okholwa kimi, loba esefile, uzakuphila. Lalowo ophilayo, ekholwa kimi, kasayikufa lanini. Uyakukholwa lokhu na?

UnguNkulunkulu olamandla, ovusa amafileyo. Siyakwazi ukuthi ungu msindisi wethu. Nguwe umgcini wethu. Nguwe ositshengisa ububele. Nguwe ophakamisa abawileyo. Nguwe osilisa abagulayo. Nguwe okhulula ababotshiweyo. Nguwe olithemba kwabafileyo njalo ubavuse. Akekho onjengawe, Nkosi yethu. Ngubani owenza abantu bafe abuye abavuse? Nguwe ovusa abafileyo ukuze baphile. Ubusisekile, Nkosi yamaKhosi ovusa abafileyo ukuze baphile.

UBUNGWELE BUKA NKULUNKULU

Amahubo 22:3

Kanti wena ungoNgcwele udunyiswa ngabako Israyeli.

Uisaya 6:3

Ungcwele, Ungcwele, Ungcwele Nkosi yamaKhosi. Umhlaba wonke ungcwele udumo lwakhe.

Ungcwele njalo lebizo lakho lingcwele. Siyakudumisa amalanga wonke. Ubusisekile Nkosi yamaKhosi, Ongcwele.

UKUPHENDUKA NJALO LOKUXOLELA

Isambulelo 3:18-22

Ngakhoke ngiyakweluleka ukuba uthenge kimi igolide elihlanjululwe ngomlilo ukuba unothe, lengubo ezimhlophe ukuze wambathe, ufihle ihlazo lokuhambaze kwakho, uthenge lamagcobo okugcoba amehlo akho ukuba ubone. Bonke engibathandayo ngiyabasola ngibatshaye, ngakhoke tshisekela ukuphenduka. Khangela, ngimi ngasemnyango ngiqoqoda, uba umuntu esizwa ilizwi lami, avule umnyango ngizakungena ngidle laye, laye adle lami. Onqobayo ngizakumnika ukuba ahlale lami esihlalweni sami sobukhosi, njengalokhu lami nganqoba ngahlala lo Baba esihlalweni sakhe sobukhosi. Olendlebe kezwe lokho uMoya akutshoyo emabandleni.

2 Imilando 7:14

Uba abantu bami ababizwa ngebizo lami bezithoba, bakhuleke bengidinga, betshiya indlela zabo ezimbi, mina ngizakuzwa ngisezulwini, ngithethelele izono zabo njalo ngikhulule ilizwe labo.

Sisondese kuwe Baba. Elizwini lakho. Sisondeze duze lawe. Siyaxolisa okubi esikwenzileyo, sincipede ukuze siphenduke. Baba wethu sixolele izono esizenzileyo. Usixolele Baba, kuhlanganisa lezono esizenze ngabomo. Ubusisekile Nkosi yamaKhosi, oxolela izono.

INSINDISO NJALO LOKUKHULULWA

Amahubo 119:153-154

Khangela ukuhlupheka kwami ungikhulule, ngoba kangiwukhohlwa umlayo wakho. Mela indaba yami, ungihlenge, ungivuselele ngokwelizwi lakho.

Uyabona ukuhlupheka kwethu. Uyasincipeda sisekuhluphekeni. Uyasincipeda ngokwebizo lakho, ngoba ungumkhululi omkhulu. Ubusisekile, Nkosi yamaKhosi, okhulula bonke.

ISabatha

Uisaya 58:13-14

Uba ungoni iSabatha, ungenzi umsebenzi wakho ngosuku lwami olungcwele, ulibize iSabatha ngokuthi liyintokozo, losuku olugcwele lweNkosi ngokuthi lulodumo, uba ulihlonipha ngokungahambi langokungasebenzi ngalo, langokungakhulumi ize, uzafumana intokozo kimi, ngizakukukhweza ezintabeni eziphakemeyo zomhlaba, ngikuphe ilifa lika Jakobe ukhokho wakho ukuba ulidle, ngoba umlomo weNkosi ukukhulumile.

Siyabonga Jehova isipho seSabatha. UyiNkosi ye Sabatha njalo uyikuphumula kwethu kwe Sabatha. Siyakujabulela njalo lelanga lakho eligcwele. Uyisibane somhlaba, sinnedise ukuze sibe ngumfanekiso wakho njalo sibe yikukhanya. Siyakunxusa emizini zethu njalo siyakubonga isipho sokuba lathi. Ubusisekile Nkosi yamaKhosi, oyi Sabatha yokuphumula kwethu.

UKUSILISWA

UJeremiya 17:14

Ngisilisa, wena Nkosi, ngisile, ungikhulule ukuba ngikhululwe, ngoba nguwe engikudumisayo.

Sisilise Nkosi yethu, ngoba ungu Nkulunkulu, umsilisi olozwelo. Ngesandla sakho, sizakusiliswa okupheleleyo. Udumile Nkosi yamaKhosi, osilisa abagulayo.

UKULUNGA

UMathewu 6:33-34

Kodwa funani kuqala umbuso wakhe lokulunga kwakhe, ngakhona lezizinto zonke zizakwengezelelwa kini. Ngakho lingaphisekeli ikusasa, ngoba ikusasa izakuziphisekela yona. Inkathazo yosuku yanele lona.

Woba lomusa Nkulunkulu wethu kubantu bakho abamqotho. Letha imivuzo emihle kubantu abakholwa njalo bethembela ebizweni lakho, abafuna kuqala umbuso wakho lokulunga kwakho. Singabi lihlaho kumbe sethuke kuphi lakuphi ngoba sithembela kuwe. Ubusisekile, Nkosi yamaKhosi, okhangela abagqondileyo.

UKUTHULA

Kwabasekolose 3:12-15

Ngakhoke, njengabakhethiweyo baka Nkulunkulu abangcwele labathandekayo, yambathani ububele lesihawu, lokuzithoba, lobumnene, lokubekezela, libekezlane, uba umuntu elensolo komunye. Njengoba iNkosi yalithethelela, yenzani njalo lina. Phezu kwakho konke lokhu yambathani uthando oluyisibopho sokuzwana okupheleleyo. Kakubuse enhliziyweni zenu ukuthula kuka Kristu, elabizelwa kukho emzimbeni munye, futhi wobani ngababongayo.

Usinike sonke abantu bakho ukuthula, okuhle, izibusiso, umusa lo zwelo. Usibusise, Nkulunkulu wethu ngokukhanya. Ngokukhanya kwakho usinike ilizwi lakho elisipha impilo. Usinike ukuthanda umusa, izibusiso, impilo lokuthula. Busisa abantu bakho ngokuthula. Ubusisekile Nkosi yamaKhosi, obusisa abantu bakhe ngokuthula.

UKUBONGA KOKUSINDISWA

Amahubo 118:14-15

Inkosi ingamandla ami lengoma yami. Lalelani ingoma zokuthokoza lezokunqoba emathenteni abalungileyo.

Siyakubonga Nkosi yethu, ngoba usilethele uthando lokwethembeka kwakho enhliziyweni zethu. Sizahlala sikubonga ngo musa wensindiso yakho njalo lendawo yethu emulini yakho.

UKUHLAKANIPHA

Amahubo 111:10

Ukwesaba iNkosi kuyikuqala kokuhlakanipha, balengqondo enhle bonke abalakho. Ukudunyiswa kwayo kumi kuze kube nini lanini.

Ukuqala kokuhlakanipha yikwesaba uNkulunkulu. Ukudunyiswa kwakhe kunaphakade. Libusisekile ibizo lombuso wakhe ongapheliyo. Ilifa lethu likuNkulunkulu wethu. Asilaleleni imfundiso yabo mama bethu, lokuqondiswa ngo baba bethu njalo lelizwi lika Nkulunkulu alakhulunywa ngabakhokheli bethu. Sikholwa kuNkulunkulu, silandela indlela eziqondileyo njalo simelele ukuphenduka kwakhe.

INHLIZIYO LOMOYA OHLAMBUKILEYO

Amahubo 51:10-12

Nkulunkulu dala kimi inhliziyo ehlambukileyo, ufake kimi umoya omutsha loqotho. Ungangiduduli ebusweni bakho, ungangamuki umoya wakho ongcwele. Buyisela kimi intokozo yokusiza kwakho, ungisekele ngomoya ovumayo.

Nkulunkulu wami, inhliziyo yami ihlanzekile. Yadalwa nguwe. Wangiphefumulela impilo kimi. Wayigcina. Ngelinye ilanga uzayithatha kimi. Ekuphileni kwami umthandazo wami yikuthi ungihlambulule inhliziyo yami, njengoba wayidala ihlambulukile. Ubusisekile Nkulunkulu owenza konke kuhlanzeke, khathesi ngihlanze ukuze ngibe lenhliyo ehlambukileyo.

ULSRAYELI LOKWAKHA IJERUSALEMA

Amahubo 147:2

INkosi iyalakha iJerusalema, iqoqe bonke abahlakazekileyo bako Israyeli.

Labo abakhuluma kubi ngo Israyeli bazaku jeziswa. Nkosi yethu siyacela ukuthi ubhidlize ububi bonke njalo wesule zonke izitha zako Israyeli. Bhidliza ngesiphazi abantu ababi ngelanga lethu. Phenduka ngomusa edholobheni lakho le Jerusalema. Sithumele insindiso yakho. Silindele ukuphenduka kuka Msindisi. Ubusisekile, Nkosi yamaKhosi, obhidliza izitha njalo owakhayo idholobho lakho.

IZIKHALI ZAMA KRISTU

Kwabase - Efesu 6:10-18

Elokucinake, qinani eNkosini lasemandleni ayo amakhulu. Hlomani izikhali zonke zika Nkulunkulu ukuze libe lamandla okumelana lobuqili buka Satane. Ngoba kasilwi lenyama legazi kodwa silwa lemibuso, lamandla, lababusi balumhlaba womnyama, lempi yemimoya emibi yaphezulu. Ngakhoke hlomani izikhali zonke zika Nkulunkulu ukuze libe lamandla okuma ngosuku olubi, lokuze kuthi lapho seliqede umsebenzi wonke lime. Ngakho manini, izinkalo zenu zibotshiwe ngeqiniso, lifakile isivikelo sesifuba esiyikulunga, lifakile amanyathelo ezinyaweni zenu ukuba lilungele ukutshumayela ivangeli lokuthula. Phezu kwakho konke lithathe isihlangu sokukholwa elizakuba lamandla okucima ngaso yonke imitshoko evuthayo yomubi, lithathe ingowane yokusiliswa, lomhedla kaMoya oyilizwi lika Nkulunkulu. Khulekani izikhathi zonke ngoMoya ngokucela konke langokunxusa. Kulokhu lilinde ngesineke sonke, linxusele abangcwele bonke.

Lamuhla sigqoka izikhali zika Nkulunkulu ukuze siqine eNkosini lemandleni avela kuye. Ngoba kasilwi lenyama legazi, kodwa silwa lemibuso, lamandla, lababusi balumhlaba womnyama, lempi yemimoya emibi yaphezulu. Sigqoka ingowane yokusiliswa, ngoba ungu msindisi wethu. Sigqoka isivikelo sesifuba esiyikulunga, ngoba uyikulunga kwethu. Sigqoka izinkalo zibotshwe ngeqiniso, ngoba uliqiniso lethu. Sigqoka amanyathelo okuthula ezinyaweni zethu, ngoba uyikuthula kwethu. Ngesinye isandla sigqoka umhedla ka Moya, okuyilizwi lika Nkulunkulu.

Kwesinye isandla sigqoka isihlangu sokukholwa esicima ngaso imitshoko evuthayo yomubi. Ngoba ulamandla ohlala kithi okwedlula ohlala emhlabeni. Siyakubonga ngezikhali zethu zamaKristu, lelizwi lakho elisithembisa ukuthi akulasikhali esilwa lathi esizaphumelela, inkulumo zonke ezilwa lathi zizakwahlulelwa ekucineni. Lokhu lilifa lethu kubakhethiweyo kuJesu. Amen.

IZITHELO ZIKA MOYA

KwabaseGalathiya 5:22-26

Kodwa izithelo zikaMoya ziluthando, lokuthokoza, lokuthula, lokubekezela, lobubele, lokulunga, lokuthembeka, lobumnene, lokuzithinta, kokunje kakulamlayo. AbakaKristu Jesu babethele umzimba kanye lokuhugeka lezinkanuko zawo. Uba siphila ngo Moya, asihambe ngo Moya. Kasingazikhukhumezi, siqalane, sifelane umona.

Lamuhla siyathandaza ukuthi izithelo zikaMoya oyiGcwele zithele izithelo ezinhle empilweni zethu ukuze sibe ngofakazi emhlabeni ngokutshengisa uthando, ukuthokoza, ukuthula, ukubekezela, ububele, ukulunga, ukuthembeka, ubumnene, ukuzithinta. Siyalahla imisebenzi yenyama lenkanuko zomhlaba ngokwehlukana ngendlela zokuziqaja kumbe umhawu. Sithandaza ukuthi usancedise ukuthi sihlale njalo sikhokhelwe nguMoya oGcwele. Masibe yikukhanya kubo bonke esihlangana labo. Sicela ukukhokhelwa ngu Moya oNgcwele ukuze sibone ngamehlo njalo silalele ngendlebe ukuze sikhokhelwe nguwe emsebenzini yethu lamuhla, Ameni.

UKUBHAPHATHIZWA NGOMOYA ONGCWELE LE ZIPHO ZIKA MOYA ONGCWELE

UMathewu 3:11

“Mina ngilibhaphathiza ngamanzi, kube yikuphenduka, kodwa yena oza emva kwami ulamandla kulami engingafanele ukuphatha amanyathelo akhe, yena uzakulibhaphatiza ngoMoya oNgcwele langomlilo.

Imisebenzi 2:4

Bonke bagcwaliswa nguMoya oNgcwele, baqala ukukhuluma ngezinye indimi njengalokhu uMoya wabanika ukuphumisela.

1 Kwabasekorinte 12:4-11

Kukhona iziphiwo ezehlukeneyo, kodwa uMoya munye. Kukhona izinkonzo ezehlukeneyo, kodwa iNkosi yinye. Kukhona imisebenzi yamandla eyehlukeneyo, kodwa munye uNkulunkulu osebenza konke kibo bonke. Kodwa ilowo lalowo uphiwa okubonakalisa uMoya kube ngokokusiza. Omunye uphiwa ngoMoya ukukhuluma ngokuhlakanipha, omunye aphiwe ilizwi lokwazi ngaye lowoMoya, omunye aphiwe ukukholwa ngalowoMoya, lomunye aphiwe iziphiwo zokusilisa ngaye uMoya lowo, omunye aphiwe ukwenza izimangaliso, omunye aphiwe ukutshumayela, omunye aphiwe ukwahlukanisa omoya, lomunye ukukhuluma indimi ngendimi, lomunye ukuchasisa indimi. Konke lokho kungumsebenzi walowoMoya munye, ebabela ilowo lalowo njengokuthanda kwakhe.

Baba, ngiyabonga ngesithembiso selizwi lakho, ukuthi ngibhaphatizwe ngoMoya oNgcwele njengoba kwenzakala kubalandeli bakho bokuqala ngosuku lwe Pentekoste. Khathesi ngiyacela ukwamukela isithembiso sokubhaphatizwa ngoMoya oNgcwele. Nkulunkulu ngiyathandaza ukuthi ungigcwalise ngamandla kaMoya oNgcwele ukuze ngikhokhele umuzi lemuli yami, ngibe yikukhanya emazweni, ukuze ngilethe ubufakazi ngokukhanya kubo bonke engihlangana labo empilweni yami. Ngiyathandaza ukuthi ungiphe izipho zikaMoyo oNgcwele njengokuthembisa kwakho elizwini lakho. Ngincedise ukuze ngisebenzise izipho lezi ngokuletha udumo kuwe. Ngiyamukela amandla avela kuMoya oNgcwele ukuze ngibe ngumfakazi wakho, ngikhokhelwa njalo ngiduduzwa yikuhlakanipha kwakho. Ngiyakudumisa ngokubonga impilo yami ngokuqhubeka ngigcwaliswe ngokubhaphatizwa nguMoya oNgcwele. Udumo lonke ku Baba, leNdodana lo Moya oNgcwele, Amen.

Ngiyacela ukwamukela isithembiso soku bhabhatizwa ngo Moya oyiNgcwele, ngiyacela ungithembe ngamandla ka Moya oyiNgcwele ukuba ngibe nguPrista ongcono emuli yami njalo ngibe yikukhanya esizweni sami, ukuba labo engiphilalabo babone ukukhanya kimi. Ngiyazithoba ngicela iziphiwo zika Moya oyiNgcwele ezithenjiswe ezwini lakho njalo ungifundisa ngizisebenzise okuletha inkazimulo kuwe. Ngiyamukela uMoya wakho ukuba ngibe ngumfakazi wakho njalo ngikhokhelwe lokududuzwa ngokukhalipha kwakho. Ngiyakuhlonipha lange mpilo yami njalo mangiguqulwe okunaphakade ngombhabhathizo kaMoya oyiNgcwele. Amen

LUNGISA UMTHANDAZO WEMULI YAKHO

Baba wethu wasezulwini, ngithandazela ngamabizo abo bonke abemuli yami. Wabazi bonke ngamunye ngamunye bengakabunjwa esiswini sika mama. Wabadala ngamunye ngamunye ngomfanekiso wakho. Ngamadodana lamadodakazi akho. Baba wethu wasezulwini lamuhla ngithandazela:

_____, Umthandazo wami ngowokuthi _____

_____, Umthandazo wami ngowokuthi _____

_____, Umthandazo wami ngowokuthi _____

_____, Umthandazo wami ngowokuthi _____

_____, Umthandazo wami ngowokuthi _____

_____, Umthandazo wami ngowokuthi _____

_____, Umthandazo wami ngowokuthi _____

_____, Umthandazo wami ngowokuthi _____

_____, Umthandazo wami ngowokuthi _____

_____, Umthandazo wami ngowokuthi _____



UKUZE UTHOLE OKUNENGI
VAKATSHELA KU CELEBRATION.ORG

